



Publicaziuns dalla vischnaunca, jamna 43

Damondas da baghegiar

2020-1065.000

Datum dalla publicaziun: Ils 23 d'october 2020

Il patrun: Vischnaunca Disentis/Mustér, Via Cons 2, 7180 Disentis/Mustér

Object: Midada d'intent digl object militar historic a Ragisch, parcella 2364, 7182 Mumpé Medel

2020-1066.000

Datum dalla publicaziun: Ils 23 d'october 2020

Il patrun: Stefan ed Andrea Buser, Brunnmattstrasse 1, 8103 Unterengstringen

Object: Sanaziun dil curtin, dalla terrassa e construcziun d'in mir da sustegn, parcella 1253, Via Aletta 61, 7180 Disentis/Mustér

Protestas:

Ils plans da construcziun ein deponi tier l'administraziun communal. L'investa publica cuoza 20 dis dapi il datum dalla publicaziun. Eventualas protestas encunter sura damonda da baghegiar ein d'inoltrar a scret enteifer 20 dis all'istanza da baghegiar, caum postal 57, 7180 Disentis/Mustér. La protesta sto esser motivada e suttascretta dil recurrent ni da siu representant.

Disentis/Mustér, ils 23 d'october 2020

Uffeci da baghegiar Disentis/Mustér

Lubientschas da baghegiar

L'istanza da baghegiar ha concediu suandontas lubientschas da baghegiar:

Nr. 2020-1058.000

Placi e Cornelia Monn-Cabalzar, Via Plaun-Sut 5, 7180 Disentis/Mustér; construcziun d'in suttetg per la terrassa existenta, parcella 1829, Via Plaun-Sut 5, 7180 Disentis/Mustér.

Nr. 2020-1059.000

Nicola Mercolli e Prema Angelika Gross, Via Sogn Antoni 18, 7182 Cavardiras; construcziun d'ina annexa sco stanza da miglier e sanaziun dil tetg principal, parcella 2125, Via Sogn Antoni 18, 7182 Cavardiras.

Nr. 2020-1060.000

Verena Werth, Via Sursilvana 5, 7180 Disentis/Mustér; reunir duas habitaziuns tier ina habitaziun enteifer igl edifeci nr. 16, parcella 912, Via Sursilvana 5, 7180 Disentis/Mustér.

Disentis/Mustér, ils 23 d'october 2020

Uffeci da baghegiar Disentis/Mustér

Annunzia da baghegiar

All'istanza da baghegiar ein sin fundament digl art.64, alinea 2 dalla lescha da baghegiar e digl art. 40 dall'ordinaziun davart la planisaziun dil territori dil cantun Grischun OPT vegniu annunziau suandont project:

Nr. 2020-2130.000

Gabriela e Herbert Büttiker, Im Giger 1B, 8525 Niederneunforn; construcziun d'ina pegna da pellets e niev tgamin, parcella 2151, Via Sogn Antoni 32, 7182 Cavardiras.

Disentis/Mustér, ils 23 d'october 2020

Uffeci da baghegiar Disentis/Mustér



Cussegl da vischnaunca

Rapport dalla seduta dils 16-10-2020

En sia seduta dils 16 d'october 2020 ha il cussegl da vischnaunca, sut il tgamun da Mario Flepp, tractau suandontas fatschentas e decidiu sco suonda:

Il cussegl ha approbau il project per la construcziun dalla senda naven da Cuolm da Vi a Stgeinas e concediu per quei project unanimamein in credit brut da frs. 299 400.–. Quella decisiun ei suttamessa al referendum facultativ. Il cantun metta en mira ina contribuziun vid ils cuosts da realisaziun da quella senda. En tgei dimensiun che quei succeda ei aunc buca decidiu.

Plinavon ha il parlament communal approbau cun 7 encunter 2 vuschs ed 1 abstenziun il project «Avertura Val Segnas – Val Sogn Placi» e concediu persunter in credit net da frs. 3 961 400.–, quei cun la resalva dall'approbaziun e creditaziun dil project entras las instanzas cantunalas.

Ils cuosts totals pil project muntan a frs. 22 920 000.–. Da quels cuosts vegnan 78 % resp. frs. 17 877 600.– finanziaj entras cantun e confederaziun, frs. 450 000.– entras l'organisaziun Alpinfra e frs. 631 000.– ord il fondo Vivian. La realisaziun dil project vegn a cuzzar entuorn 25 onns. Duront quei temps vegn il project a generar onn per onn investiziuns entuorn 1 milliun francs che vegnan subvenziunadas e sustenidas per 80 %. Quei impurtont project en favur dalla tgira da nies uaul da schurmetg vegn suttamess alla votaziun dil pievel dils 29 da november 2020.

Suprastonza communal

Referendum facultativ

A caschun da sia seduta dils 16 d'october 2020 ha il cussegl da vischnaunca approbau unanimamein il project per la construcziun dalla senda naven da Cuolm da Vi a Stgeinas e concediu persunter in credit brut da frs. 299 400.–.

Conform ad art. 21 lit. c dalla costituziun communal ei quella decisiun suttamessa al referendum facultativ. Il messadi davart quella fatschenta ei exponius per investa en casa communal (stanza nr. 10).

Enteifer 20 dis dapi la publicaziun officiala han 80 votants la pusseivladad d'inoltrar enviers sura conclus il referendum e pretender ina votaziun dil pievel.

Suprastonza communal

Reformaziun dalla fossa comunabla

Dapi igl atun 2015 sesanfla en santeri Sogn Gions ina fossa comunabla. La cumparsa dalla fossa comunabla cuntenta denton buca. Tier mintga sepultura d'ina urna vegn il tschespet dalla fossa comunabla donnegiaus e fa cheutras ina malcultivada pareta. Quella situaziun ha motivau in beinvulent donatur, il qual vul buca vegnir numnaus, da far ina generusa donaziun per meglierar quella situaziun.

Sin fundament da quellas circumstanzias ha la suprastonza communal decidiu da reformar la fossa comunabla e cun quella caschun era d'adattar e cumpletar ils contuorns dil santeri. Igl artist local Antonino Di Bella ha sviluppu per la fossa comunabla in niev concept ed ina sculptura. Las lavurs da sanaziun van plaunsiu a fin e la sculptura vegn installada la fin d'october. Pil di da Numnasontga da dumengia, igl 1. da november 2020, a caschun dalla devoziun da suentermiezdi, vegn la nova fossa comunabla inaugurada.



Niev sistem da sepultura per la fossa comunabla

Entochen dacheu vegnevan las urnas mintgamai satradas ensemen cun la tschendra. Ella nova fossa comunabla vegn mo pli deponiu la tschendra senza l'urna. Suentar las funcziuns en santeri vegn la tschendra svidada entras ils funcziunaris communalas ella fossa comunabla. L'urna vegn silsuentar returnada als parents ni sin giavisch dismissa. En quei connex fagein nus attents ch'igl ei era pusseivel da sulettamein affittar in'urna tier igl institut da sepultura pil temps dallas funcziuns da cumiau.

Urnas gia satradas en la fossa comunabla

Agl ur dalla fossa comunabla vegn da niev tschentau in tabla culs nums dils defuncts. Sin quella tabla vegnan era ils nums dils defuncts gia satrai ella fossa comunabla menziunai. Las tablas da crap cun las inscripziuns existentas restan el plaz actual ni ch'ellas vegnan sin giavisch dils parents allontanadas.

Suprastonza communal

Suprastonza communal

Repartiziun dils departaments per la perioda d'uffeci 2021/2024

La suprastonza communal eligida per la perioda d'uffeci 2021/2024 ei seconstituida ed ha repartiu suandontamein ils departaments:

René Epp, president communal

Administraziun, finanzas ed economia

- administraziun/finanzas
- cudisch funsil
- economia
- persunal
- survetsch polizial
- survigilonza giuridica
- turissem

Clemens Berther, gerau

Forestalessar ed agricultura

- agricultura
- Center da sport e cultura
- forestalessar
- megliazziuns
- menaschi tecnic (lurvatori communal)
- vias forestalas e funsilas

Wendelin Jacomet, gerau

Baghegiar ed infrastruttura

- edifecis communalas
- punts e rempars
- traffic
- uffeci da baghegiar
- vias, illuminaziun publica

Jris Lombris, geraua

Sanadad, scolaziun, cultura e sport

- Center da sanadad Puntreis
- cultura
- formaziun professiunala
- ovras socialas
- scolas
- Seniors-Ca



- Spital regional Surselva
- sport
- temps liber
- tgira ambulonta

Paul Flurin Schmidt, gerau

Ambient e segirtad

- deponias ed explotaziun da glera
- dismessa da rumians e cadavers
- militar
- polizia da fiug
- protecziun civila
- providiment e purificaziun dallas auas
- pumpiers
- santeri

Administraziun communal

Serrada da vias d’uaul

Via d’uaul Cavardiras – Caischavedra – ADATG, midada da termin

Muort lavurs da construcziun vid la via d’uaul da Cavardiras– Caischavedra (remplazzament dil canaster da lenna sut via sco era dalla cuvrida dalla punt) vegn la via serrada naven dils **19 d’october entochen ils 30 d’october 2020** per tut traffic, pia era per pedunzs. Duront la fin d’jamna ei la via aviarta. Quei naven dalla cruschada a Runtget entochen tier las Aclas da Cavardiras.

Via d’uaul Runfoppa

Muort lavurs da transport da lenna cun suga e camiun a Runfoppa Sut vegn la via da Runfoppa mintgamai ad esser serrada pil traffic motorisau sco era per pedunzs duront il temps da lavur. Las lavurs entscheivan prevedentamein (dependent dall’aura) **gliendisdis, ils 26 d’october 2020** e cuozan duas jamnas. La via vegn ad esser serrada naven dalla damaun allas 7.00 entochen la sera allas 18.30. Per pedunzs ei igl access ensivians garantius sur la via veglia viers Pégn Rodund.

Dalla punt a Runfoppa Sut, Val Calaus vegn remplazzau la cuvrida da lenn. Per quei intent vegn la via serrada naven dils **4 da november 2020** duront duas jamnas per tut traffic. Per pedunzs ei igl access ensivians garantius sur la via veglia viers Pégn Rodund.
Bien engraziament per l’enconuschientscha e capientscha.

Uffeci forestal Disentis/Mustér

Serrada dalla Via da Paders

Muort las lavurs da construcziun vid l’illuminaziun publica vegn la Via da Paders serrada per tut diever incl. pedunzs e velocipedists.

Las lavurs da construcziun entscheivan ils 2 da november e cuozan entochen la fin november 2020.

Nus supplichein da risguardar las signalisaziuns corrispudentas.

Bien engraziament per Vossa capientscha.

Uffeci da baghegiar ed infrastruttura



Controlla da habitonts

Naschientscha

Nino Huonder, naschius ils 13 d'october 2020, fegl da Michaela ed Adrian Huonder.

Colonna d'agid Mustér

Cuors da reiver per affons

Gia dapi biars onns organischescha la Colonna d'agid Mustér mintga stad cuors da reiver per affons. Per dar era igl atun la pusseivladad da trenar da reiver vegn organisau duront otg mesjamnas sera in cuors da reiver per affons dallas annadas 2012 entochen 2008.

Liug: Halla da reiver el Center da sport e cultura, Mustér

Entschatta: mesjamna, ils 28-10-2020 entochen miez december 2020
Annadas 2012 entochen 2008
17.30–19.00

Menaders: Commembers dalla Colonna d'agid Mustér cun brevet
Giuventetgna e sport

Annunzias: Entochen gliendisdis, ils 26-10-2020 alla Colonna d'agid Mustér,
Otmar Venzin tel. 079 381 25 52.

Segirada ei caussa da mintga participont/a.
Colonna d'agid Mustér

Pendicularas Mustér SA

Las Pendicularas Mustér SA organischeschan ina fiera silla piazza dil Catrina Resort.
Cu: **Ils 29 da december 2020** dallas 14.00–19.00.

Haveis Vus interess da vender Vos products? Lu s'annunziei entochen ils 18 da november 2020 per e-mail tier: e.bundi@catrina.swiss. Per damondas stat bugen Erna Bundi a disposiziun, 081 920 30 40.

Nus selegrein sin Vossa participaziun.

Seniora-Ca

Cun optimissem levan nus entscheiver puspei il meins october – mo – tut annullau tochen il meins da schaner 2021. Nus sperein che tuts/tuttas hagian surmuntau bein quei temps e seigien vegni schurmegiai dil virus. Seniora-Ca ha scret in pign messadi per e-mail – has era ti e-mail e buca reschiert posta electronica – lu s'annunzia tier: linus@maissen-desax.ch

Preziada seniora/preziau senior

Eis ti empauet isolaus, forsa restrenschiu en tias activitads – lu s'annunzia! Ed insumma mirei in tec dretg ni seniester sch'enzatgi duvrass sustegn – ina certa lavur cumina sco pli baul – pertgei buc era el temps da Corona?

Stei sauns!
Team Seniora-Ca



Club da Curling Disentis/CCD

Dar curling – era enzatgei per tei?

Has interess? Lu fagein nus bugen a ti in cordial beinvegni tier nossa radunoza generala che ha liug el hotel «Alpsu» **venderdis, ils 30 d'october 2020**, allas 19.30.

S'annunzia sut 079 697 83 40 ni bruno.flepp@kns.ch
Bruno Flepp, president CC Disentis
